

Nioqutissanik eqqussuineq annissuinerlu pillugit Inatsisartut inatsisaata allangortinnera pillugu Inatsisartut inatsisissaattut siunnersuut

(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut Naalakkersuisoq)

Saqqummiussissut

Siullermeerneqarnera

Nioqutissanik eqqussuineq annissuinerlu pillugit Inatsisartut inatsisaata allangortinnera pillugu Inatsisartut inatsisissaattut siunnersuut Naalakkersuisut sinnerlugit saqqummiuppara.

Angallannerup allangornerata kinguneranik piffissap akitsuusiissussaatitaanerup atuutilerfianut malittarisassat allangortinneqassasut Naalakkersuisut siunnersuuteqarput. Angallannerup allangortinneranut pissutaasoq pingaarneq tassaavoq Aalborgimi Grønlandshavnip umiarsualivittut aallaavittut atuukkunnaarnera. Allanguinerup kinguneraa, akitsuusiissussaatitaaneq nassiussat nioqutissalluunnit umiarsuarmut Danmarkimit Kalaallit Nunaannut aallartup usilersuunneqarpata atuutilernera. Tamanna nassiussat Danmarkimit Kalaallit Nunaannut ingerlanermi, soorlu Sverigimut, Norgemut, Savalimmiunut imaluunnit Islandimut tulannermi, nioqutissanut usilersuunneqartunut aamma atuuppoq.

Siunnersuut aamma aalajangersakkanik nutaanik arlalinnik imaqarpoq, naatsorsuutaavorlu nunatsinni innuttaasut kiffaangissuseqarnerulissasut amerlanernillu toqqaanissamik periarfissinneqarlutik.

Atlantiku ikaarlugu mittarfinni nutaani ilaasunit aqqusaarfik qimappassuk anniffissat assigiinngitsut toqqarneqarsinnaassapput. Ilaasut ”sumiiffik aappaluttoq” imaluunniit ”sumiiffik qorsuk” toqqarsinnaassavai.

Timmisartumut ilaasut sumiiffimmi aappalaartumi nioqutissat akitsuuserneqartussaatitaasut piumassutsiminnik akitsuusertissinnaassavai. Immiaaqqat, viinnit, imigassat, cigaritsit tupallu allat tikinnermi akitsuuteqartussaangitsut akuerineqartut tallimararterutai tikillugit piumassutsimik akitsuusertinneqarsinnaassapput. Piumassutsimik akitsuusertitsinerup kinguneraa nioqutissanut akitsuut suliarinninnermilu akiliut tikittup akilissagai.

Peqatigitillugu siunnersuutaavoq arsaarinninneq pillugu malittarisassat naleqqussarneqassasut, tassa ilimagineqarmat allanguutissasut siunnersuutigineqartut nioqutissat arsaarinnissutigineqartut ikilinerannik kinguneqassasut.

Atuisut malittarisassat atuuttut malillugit immiaaqqanik, viinninik, imigassanik najukkami pisiniarfinni nassaassangitsunik tikisitsinnaanermut periarfissai killeqarput. Inuusutissarsiortut kisimik nioqutissanik taakkuninnga eqqussisinnaanermut ullumikkut akuerisaapput.

Innuttaasut immiaaqqanik, viinninik imigassanillu tikisitsinissaq pillugu akileraaruseriffimmut siunissami qinnuteqarsinnaassapput. Taaneqartartoq nammineq eqqussuineq.

Siunertaq tassaavoq immiaaqqanik, viinninik imigassanillu atuineq peqatigitillugu annertusisinnagu inunnut atuisunut nioqqtissat neqeroorutigineqartut amerlineqassasut. Immiaaqqat, viinnit imigassallu nammineq eqqustilluni pisiarineqarpata najukkami pisiniarfinni nioqqtissat akiinit malunnartumik akikinneruppata, peqqissutsimut imigassamullu politikki nunatsinni atorineqartoq kimeerutsissinnaavaa. Taamaammatt siunnersuutaavoq ataasiartumik akuersissummik qinnuteqarnermut atatillugu nioqqtissamik eqqussuinermit akitsuummut nalinginnaasumut akitsuummik ilassummik 50 procentimik akiliisoqartassasoq.

Ilassummik akitsuummi siunertaq tassaavoq nammineq eqqussuinermit nioqqtissap akiata nioqqtissallu nunatsinni pisiniarfinni tuniniaanermi akiata assigiinngissutaat annikillisinneqassasoq.

Siunnersuutaavoq aamma nammineq eqqussinissamik akuersissummik qinnuteqarnermut akiliut 250 kr. atuutilersinneqassasoq. Akiliummi siunertavoq akuersissuteqartarnermik aqqissuussuinermit allaffissornerulernermit aningaasartuutitut matussutaanissaa.

Inatsissatut siunnersuut tassungalu nassuiaatit innersuussutigaa.

Taamatut oqaaseqarlunga siunnersuut Naalakkersuisut sinnerlugit Inatsisartunut suliaannortippara.